

後
樂
集

後樂集

四庫全書珍本初集
別集
集
類部

商務印書館受教育
部中央圖書館籌備
處委託景印故宮博
物院所藏文淵閣本

欽定四庫全書

集部四

提要

後樂集二十卷

別集類三

宋

臣等謹案後樂集二十卷宋衛涇撰涇字清

叔華亭人徙居崑山登淳熙十一年進士第

一人王楙野客叢書乃謂潮至夷亭出狀元

甲辰衛涇果魁天下者也累官叅知政事封

秦國公卒謚文節其事蹟不具於宋史惟南

宋翰苑題名記載涇以開禧二年七月官中
書舍人兼修玉牒官直學士院十月除吏部
侍郎兼侍讀三年十月除禮部尚書十一月
除御史中丞宋史宰輔表載開禧三年十一
月丙戌涇自中奉大夫試御史中丞除端明
殿學士簽書樞密院事丁亥兼權叅知政事
十二月壬戌涇與雷孝友同除叅知政事嘉
定元年六月乙亥罷為資政殿學士知潭州

而集中謝表自潭州以後又嘗一知福州再
知隆興府其歷官歲月尚可考見涇初號拙
齋居士改號西園居士後築堂成取范仲淹
岳陽樓記中語題之曰後樂堂遂以自號并
名其集原本凡七十卷乃其子樵所編嘗刻
之於永州歲久亡佚明楊樞崧故述僅存其
名而其本已不可見今從永樂大典中裒輯
編次釐為二十卷衛氏在宋世以文學知名

涇諸父膚敏紹興間為禮部侍郎立朝頗著
風采涇弟湜亦湛深經術所著禮記集說已
別著錄涇所作大都和平溫雅具有體裁歸
有光震川集稱其文章議論有裨當世當韓
侂冑用事時隱居十年於所居石浦闢西園
堅卧不出其進退之際盖能以禮自守者今
即集中諸奏疏考之其應詔論北伐劄子謂
兩國相敵持重者安輕動者危應兵常勝首

事常沮力詆侂冑開釁之非詞意極為切直
其劾易祓朱質林行諸狀亦能抵觸奸佞侃
侃不阿他所論列並中竅要在當時可稱正
人特其執政未久宋史又佚不傳其大節幾
就湮沒幸而遺文復顯猶可据以見其仕履
之大畧故著之於錄補史文所未及焉乾隆
四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

後樂集卷一

宋 衛涇 撰

外制

從事郎趙汝談特授行太社令制

宗室之賢而文若漢間平唐賀白蓋不多見如爾之力
學好修辭章雅健良足嘉尚寘之曲臺益懋器業朕將
有觀焉可

朝散郎行太社令洪伋特授大理寺簿制

漢儒以簿書獄訟為非本務然廷尉天下之平文牘叢
委鈎稽無法吏並緣為姦民命顧不重耶爾生於名閥
才諳有聞繇稷嗣之聯列理官之屬體朕此意思所以
稱其職者佇對褒陟可

承議郎幹辦行在諸司糧料院林拱辰依前官
特授行大理寺主簿制

廷尉之獄民命所繫朕以文法吏與儒者參用厥有深
旨爾學識敏茂嘗次兩科宰劇甚優曉暢世務蓋有用

之材也列屬棘寺益試爾能其鈎攷稽違參訂疑誤庶
幾助朕哀矜欽恤之意毋曰簿書期會而已也可

通直郎太學博士錢廷玉除太常博士制

奉常專禮樂之司兼夷夔之任昔之勤勞王家者亦於
是而紀成績焉至唐則以博士掌戎府書檄古今用人
是或一道爾蚤躋膺仕繼收雋科蔚然聲稱達於朕聽
比橫經於學省旋列屬於頌臺未究爾材當為時用矧
克濟世美自許功名方贊畫軍旅之間豈特聞俎豆之

事策勲既至論賞孰先可

通直郎賜緋魚袋王克勤依前官特授太常寺

主簿制

爾總角知名被遇烈祖讀冊府之書踰三十年矣頃又
以力學自奮名第徊翔州縣既用復跌然遂得以其餘
暇涵養遠業豈老其才而后用耶朕愛惜人物振拔滯
淹比加收召俾寘曲臺簿領雖卑與聞禮樂之事往遊
其間以俟褒陟可

從政郎光州宜城縣令邵峴以淮南運判李洪
申管押第一次糧料至蔡州軍前乞旌別特改
宣教郎制

自削舉員限歲額改秩之制益嚴爾為令長轉護軍須
率先諸邑部使者以績狀聞度越獎章陞華京寺足以
旌爾能矣夫用民力於有事之日固當寬民力於閒暇
之時祇服恩徽勉思惠養可

袁案因講筵論語徹章習學文字轉承信郎制

欽定四庫全書
卷一
魯論終篇儒臣第賞爾習刀筆亦與有勞遂陟武階抑
云幸矣可不勉哉可

迪功郎徐晃充換會子局賞循修職郎制

楮幣濟貨泉之阜通而未免更易之煩爾以監臨第勞
應賞俾陟文資尚勉職業可

朝奉郎行太常寺主簿劉彌正差出淮上相度

驅磨措置事件有勞特授朝散郎差遣如故制

朕操馭臣之柄有勞必錄所以存公道示激勸也日者

兩淮貨泉壅滯出納隱欺重水潦之為災趣春和而議
貸爾以儒者該練將指咨詢得其事情馳以歸報爰進
一秩庸旌爾能其益勵於遠猷以對揚于休寵可

修職郎李圭用玉牒日厯聖政會要四處進書
賞循從事郎制

金匱奏篇累勞第賞爾與名其間豈以久而或遺敘陟
文資曾為華寵其思所以稱此哉可

陳良彪除閤門舍人制

朕惟烈祖上閤置舍人以擬三館儲材之地實為右列
之清選爾早游庠序嘗冠名科久服戎行譽處彌懋朱
華列屬不試而命足為爾寵其益思奮勵以無負待遇
之意可

從事郎行國子錄陳振依前官特授太學博士
承直郎兩浙轉運司幹辦公事陸峻依前官特
授行國子錄制

儒林之官博士掌教學錄主規所任若不同而訓迪糾